

Euskaltzain urgazle horiez gain, **William Anthony Douglas** proposatzen da ohorezkoen mailarako. Douglas jaunak Renoko "Basque Studies Program" izeneko Saila sortu zuen Nevadako Unibertsitatean. Gainera, liburu eta artikulu askoren egile dugu (*Death in Murelaga*, 1970, eta *Amerikanuak*, 1975, tartean).

Azkoitian, 1998eko martxoaren 27an

* * *

Bilbon, 1998ko apirilaren 24an Ageriko batzarra

Bilbon, Plaza Barriko Euskaltzaindiaren Egoitzan, 1998ko apirilaren 27an, arratsaldeko Setan, hasi da batzar irekia.

Honako jaun-andre hauek bildu dira:

Euskaltzain osoak: J. Haritschelhar, euskaltzainburua, H. Knörr, buruordea, P. Goenaga, idazkaria, J. A. Arana, diruzaina, eta P. Altuna, P. Charriton, J. L. Davant, X. Diharce, X. Kintana, F. Krutwig, E. Larre, J. M. Lekuona, B. Oihartzabal, P. Ondarra, Tx. Peillen, J. San Martin, A. Urrutia eta L. Villasante.

Euskaltzain ohorezkoak: E. Agirretxe, J. Atxa, K. Esnal, K. Etxenagusia, X. Ge-reño, eta J. A. Loidi. J. Berrojalbizen ordeez, Isabel Andía, haren alaba.

Euskaltzain urgazleak: P. Arregi, R. Badiola, A. Eguzkitza, M. Gorrotxategi, J. L. Lizundia, A. Muniategi, K. Rotaetxe, M. M. Ruiz Urrestarazu, P. Uribarren eta J. J. Zearreta.

Mahaiburua Zuzendaritzak osatu du J. Haritschelhar jaunaren lehendakaritzapean.

1. Goizeko bileraren berri.

Lehenbizi, P. Goenaga idazkariak goizeko bilkuraren berri eman du. Alde batetik hiztegi batuari dagozkion erabakiak aipatuz eta ondoren euskaltzain ohorezko berriak onartzeko erabakiaren berri emanaz. Hauek dira izendatu berriak: Jesus Atxa Agirre; Julene Berrojalbiz Berrojalbiz; William Anthony Douglas; Karmele Esnal Zulaika; Marie-Jeanne Minaberri; Jaime Kerexeta Gallastegi; Xabier Gereño Arrarte; Karmelo Etxenagusia Uribe; Jose Antonio Loidi Bizkarrondo eta Eugenio Agirretxe Azpillaga jaun-andreak.

2. Hilberri txostenak.

J. M. Satrustegik Jose Maria Azpiroz jaunaren omenez idatzitako hilberri txostena irakurri du idazkariak. Txostenean, haren apaiz eta euskaltzale alderdiak azpimarratu dira.

Abel Muniategi jaunak irakurri du ondoren Jesus Oleagaren hilberri txostena. Hemen ere hilaren lana eta nortasuna jarri nahi izan dira agerian: legegizona alde batetik eta euskaltzalea bestetik.

Azkenik, J. San Martinek irakurri du joan den urte amaieran zendu zen Karlos Santamaria euskaltzain ohorezkoaren omenezko txostena. Gizon irekia, kezkatua eta pres-tua. Zientziaz, filosofiaz, euskalgintzaz, hezkuntzaz eta abarrez kezkatua.

3. Euskaltzain ohorezko izendatu berrien aldarrikapena.

Goizean onartuak izan diren euskaltzain ohorezko berriei banan-banan dei egin die ondoren euskaltzainburuak bakoitzari bere diploma emateko. Kerexeta jauna azken orduko ondoez baten erruz, ezin izan da etorri diploma jasotzera. J. Berrojalbizen izenean alabak jaso du. Minaberri andreari, berriz, Baionan egingo den ekitaldian emango zaiola adierazi du euskaltzainburuak. Douglas jauna ere ez da izan bileran.

Euskaltzainburuak zorionak eman dizkie izendatu berri guztiei. Hauek, berriz, izen-dapena eskertu dute, jendaurrean, hitz labur batzuekin.

4. A. d'Abbadieren erretratua Euskaltzaindiaren esku lagatzea.

Azkenik, V. Ameztoty pintoreak Eusko Jauriaritzaren aginduz egindako A. d'Abbadieren erretratua Euskaltzaindiaren eskuetan uzteko hitzarmena gauzatu da. Lehen-bizi, M. Karmen Garmendia, Kultura sailburuak, Gobernuak hartutako erabakiaren berri eman du eta obra hori Euskaltzaindiaren esku uztearen arrazoiak azaldu.

Euskaltzainburuak 1997an egindako Biltzarra aipatu du, Euskaltzaindiaren eta Eusko Ikaskuntzaren artean eratu. Aktak aurtan agertuko direla esan du eta hori dela d'Abbadieren omenez Euskaltzaindiak ekarri duena. Eskerrak eman dizkio Kultura sailburuari.

Ondoren koadroa agerian jarri da eta Haritschelhar jaunak erretratuan biltzen diren sinboloen eta irudien esanahia argitzen saiatu da jendaurrean.

Eta honenbestez, arratsaldeko seiak eta erdietan amaitutzat eman da arratsaldeko bilkura irekia.

Euskaltzainburuak
Jean Haritschelhar

Idazkariak
Patxi Goenaga

* * *